



## INTRODUCZIUN

DAD URSICIN G. G. DERUNGS-BARTOLOMEI

*La cuminonza digl evangeli de Gion entuorn ils onns 100 s. Cr. sedamonda: «Nua ei Jesus ius?» Per quei stat siu cumiau el center dils discuors della davosa tscheina. Mo igl evangeli de Gion gioga era cheu cun in paradox: Mia partenza ei in niev retuorn, definitiv; quei ei exprimiu cun l'empermischun: «nus vegnin e prendein avdonza». «Nus»: il Bab e Jesus che plaida. Savens stat è il plaid «restar»: entrar en relaziun e cuminonza de veta. E quei ei il medem sco «carezar»: «tgi che careza mei, vegn ad observar miu plaid; miu Bab vegn a carezar el, e nus vegnin tier el e prendein avdonza tier el». «Carezar» stat buca sut la categoria moralistica da camonds e scamonds, ni sut quella da cundiziuns sco en in contract. Carezia ei ina purschida nunmeritada, ina purschida de veta che vegn cheu da fetg ault e porta il cartent ella veta sezza de Diu, pertgei «miu Bab vegn a carezar el». Quei ei ina gronda empermischun, l'empermischun pascala e quella dil «Spert Sogn ch'il Bab vegn a tarmetter en miu num»: Consolader, Paracler, Gidonter vegn el numnaus. Sia vegnida ei il retuorn de Jesus, ed ei la veta de Jesus e dil Bab en nus. Quei ei la pasch, tgiembel de veta, che negin auter sa dar. – Ei dat strusch zanua in text da pli aulta spiritualitad.*

## EVANGELI

Gn 14,23–29

<sup>23</sup>Jesus ha rispundiu e detg ad el: Tgi che careza mei, vegn ad observar miu plaid; miu Bab vegn a carezar el, e nus vegnin tier el e prendein avdonza tier el. <sup>24</sup>Tgi che careza buca mei, observa buca mes plaid. Ed il plaid che vus udis ei buca mes, mobein dil Bab che ha tarmess mei.

<sup>25</sup>Quei hai jeu detg a vus, duront che jeu sun aunc cun vus. <sup>26</sup>Il Gidonter denton, il Spert sogn ch'il bab vegn a tarmetter en miu num, lez vegn a mussar a vus tut e regurdar vus vida tut quei che jeu hai detg a vus. <sup>27</sup>Pasch lasch jeu anavos a vus, mia pasch dun jeu a vus; buca sco il mund dat pasch, dun jeu pasch a vus. Vies cor duei buca sestermentar e temer. <sup>28</sup>Vus veis udiu che jeu hai detg a vus: Jeu mon naven e tuornel tier vus. Sche vus carezasses mei, selegrasses vus che jeu mon tier il Bab; pertgei il Bab ei pli gronds che jeu. <sup>29</sup>Ed ussa hai jeu detg ei a vus, avon ch'ei daventi, per che vus carteies, cura ch'ei daventa.